

A favur da la taxaziun individuala

Il deputà Lukas Horrer vul engaschi chantunal per midar la taxaziun fiscala

DAD ANDREAS CADONAU/FMR

■ **Midar da la taxaziun fiscala da famiglia e conjugals tar la taxaziun individuala vul il deputà Lukas Horrer (PS, Cuira) e pretenda dal chantun Grischun da lantschar in'iniativa. Sia proposta per in conclus direct dal Cussegl grond ha il deputà deponì a chaschun da la sessiun dal favrer.** Strusch 60 deputadas e deputads han sutsegnà la proposta dal deputà *Lukas Horrer* per ina midada dal sistem da la taxaziun fiscala sin nivel federal. Ed els vulan lantschar quella midada via ina proposta per in conclus direct per in'iniativa dal Chantun. Sin fundament da l'artitgel 160 da la Constituziun federala duai il chantun Grischun pretender ina midada da la basa legala federala per pussibilitar da midar da la taxaziun da famiglia e da conjugals tar la taxaziun individuala.

Na correspunda betg a la realitad

Sco quai che Horrer scriva en sia proposta na correspundia la taxaziun actuala betg pli a la realitad da la societad. Il sistem actual da la taxaziun da taglia sa drizzia tranter auter al stadi civil. Quai proceder stettia adina pli fitg en contradicziun a la situaziun sociala contemporanea. Era la lètg antruras il model normal da la convenienza na saja quai ozendi betg pli adina il cas. Il deputà regorda en sia istanza che bleras lètg vegnian separadas ed adina dapli famiglias da «patchwork» s'etableschian. Societads liberalas ed avertas che surlaschian als umans da decider davart lur furma da viver na duajan betg privilegiar ina u l'autra furma da viver, scriva il deputà. Sco alternativa al sistem da taxaziun actual vesa Horrer la



Il deputà Lukas Horrer (PS, Cuira) propoia in'iniativa chantunala per midar il sistem da la taxaziun fiscala sin nivel federal.

FOTO P. DE JONG

taxaziun individuala independenta dal stadi civil.

Quella, uschia Horrer, resguardia dad ina vart las realitads da la vita sociala e promovia las activitads professiunalas da las dunnas.

Schliar divers problems

Vinavant, uschia Horrer, pussibiliteschia ina midada tar la taxaziun individuala da

schliar divers problems. Per exempel la taxaziun ineguala da personas che vivan en ina lètg visavi talas en concubinat u da reglar fiscalmain la situaziun da personas ch'educheschian sulettas.

La situaziun pertutgant la taxaziun tar la Confederaziun valitescha il deputà per averta e damai ch'ils chantuns sajan pertutgads da la taxaziun fiscala saja in engaschi en chausa legitim.